



Im Juli 2007

Ladbrieaf

Richtigstellung

Älleweil liest mr - sogar en seriöse Zeitonga -
mir Schwoba kenne nix Schöners als Häusla baua ond Schaffa.
Von mir aus, soll's weiter behaupta, wer's glauba will.
Blos, stemma duets net, (oder saga mr mol, net hondert Prozent)-
weil: ons fällt ao no was anders ei, mindestens so schee,
ond weniger schweißtreibend ond net so nervazehend
wia s'Schaffa uff ra Baustell. Ja, ganz g'wiß, s'isch net verloga.
Beispiel wüsst-i viele, aber heit verzehl-i bloß ois,
weil des hochaktuell isch ond glei vor dr Haustür.

Also, horchet her: mittla en dr Woch, am letzte Donnerschtig em Juli,
do fanget a paar Männer bei ons em Flecka mittla uff dr Stroß zom Baua a.
Noi, noi, net dass-r moinat, dia wellat doch wieder a Häusle baua,
desmol wirklich net - noi - dui Kirchgass isch net verkäuflich als Baugrund.
Dia hantieret mit Balka ond Stanga ond Bretter ond fabrizieret
oms Nomgucka a Gstell für a Dach über da Kopf, aber net für sich,
sondern für da ganza Flecka ond no an haufa Gäst drzual -
Richtich, jetzt hots bei euch g'schnacklet! Se bauet a Zelt.
A Haus auf Zeit - zom Feira für zwoi Tag.
Weil, s'Dach überm Kopf isch's Wichtigste bei ma Haus,
ond em Sommer duats ois ganz ohne Heizong.
A Tribüne für'd Musik, a Häusle für da Kassawart,
a extra Dächle zom Brota von de guate Sacha,
alles stoht en null komma nix. Ond am Samschtich ab Sechse-
do dürfet-er komma ond gucka ond euch überzeuga -
mir kennet ao no Schöners als Schwitza auf ra Baustell!
Mir schwitzat liaber beim Feira ond Essa ond Schwätza!
Ond am liabsta feshta mr mit euch alle, mit Leit vom Täle
oder vom Onderland oder sogar von Stuegert.
Kommet oifach am Samschtich oder am Sonndich -
ond glaubet nemme alles was mr so verzehlt
über dia Schwoba ond's Häuserbaua.

Ihre
Ev. Kirchengemeinde

Johanna Raumer, Pfarrerin

Ihr
gemischter Chor

Karl Straub

Ihre
Schützengesellschaft

Ralf Doll